



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LEKUCALA (P1)

LWETI 2010

EMAMAKI: 70

SIKHATSI: 2 ema-awa

Leliphepha linemakhasi lali-12.

TICONDZISO KULABAHLOLWAKO

1. Leliphepha lehlukaniwe tigaba LETINTSATFU:

SIGABA A: Siviso	(30)
SIGABA B: Sifinyeto	(10)
SIGABA C: Luhlelo nelulwimi	(30)
2. Fundza tonkhe ticondziso ngekucopehela.
3. Phendvula yonkhe imibuto ngeSiswati.
4. Cala LESO NALESO sigaba ekhasini LELISHA.
5. Dvwebela ekugcineni kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Shiya umugca emkhatsini wetimphendvulo takho.
8. Bhala ngebunono nangesandla lesifundzekako.
9. Caphelisisa sipelingi/lupelomagama nendlela lewakha ngayo imisho.

SIGABA A: SIVISISO**UMBUTO 1****1.1 Fundza lethekesthi lelandzelako bese uphendvula imibuto letawulandzela.**

NgeLisontfo ekuseni nakugabanca insimbi yemfica wabe angekhatsi edolobheni eNhlangano Zibonele. Abekubone kungambambelela kulindzela ibhasi kantsi kubuye kuLisontfo emabhasi ayindlala. Yekucala leyayingamsita yendlula emini kabi. Ngaleso sizatfu wavuka ngeluvivi watimisela kuhamba acela timoti letatibheka ngakhona eNhlangano. Ngiyo-ke lena leyase imfikise ngaleso sikhatsi.

Washeshe wayitfolo ibhasi leyayiya kaHlatsi, kwatsi hhemu emphefumulweni wakhe ngobe vele abengakutsandzi kuhlala eNhlangano ngobe abengate abonwe ngulabo bebavele bambambela ngasemoyeni. Abengakakwetayeli kuhamba ngalowo mgwaco losuka eNhlangano uya kaHlatsi ngobe abewuhambe kanye solo aba khona. Yebo, kaHlatsi abekwati kodvwa esibhedlela sakhona abengakwati. Kodvwa watidvudvuta ngekutsi utawubuta bamlayele.

Ngenhlanhla watibonela ibhodi lebhawle ngemagama lamakhulu lakhombisa ngalapho sibhedlela singakhona. Walandzela tona tinkhomba wate wayewungena ngekhati esibhedlela. Watsi nakangena unina waSiphilile wamfanisa lomuntfu longenako, wavele wachumuka wakhala. Zibonele wake wema lapho ngasemnyango, agolotele kulowo mbhede lowawulele Siphilile, wabona kutsi abesatumekile kodvwa kwammangalisa kubona kwangatsi kwakuphambene emabhandishi lapha enhloko yakhe. Abelele abhekiswe etulu, lapha etimphumulweni kugcishwe volo ngalapha nangalapha, asebentisa umlomo nakaphefumula. Weva tishisa emehlo Zibonele nakabona simo lakuso Siphilile. Wachubeka wakhala lomake. Wasondzela Zibonele inhlatiyo yakhe ibuhlungu kabi.

"Kahle! Kahle! Musa kusondzela! Sewufuna kumcedzisa, umbone kutsi sewufe sibili?" Akhale kakhulu manje lomake. Ametfusa lawo mavi Zibonele. Wasale wema khona lapho abeme khona. Asemile wabona asanyakata Siphilile, wasuka lapho wahlahla emehlo kakhulu kwate kwametfusa loko Zibonele.

"Ye Siphilile, sekunjani?" kubuta unina amphatsaphatsa. Akaphendvulanga Siphilile kodvwa wachubeka wahlahla emehlo akhe agijima nayo yonkhe lendlu. Atsi kube afike kuZibonele lawo mehlo wahleka kakhulu.

"Ungubani-ke wena? Ufunani lapha? Uphi Zibonele, umshiyephi? Ute ungisite umtjele kutsi angifuni kuphindze ngimbone," watsi kucedza lawo mavi wakhala kakhulu.

"Ye mntfwanebantfu! Bengisacela kwekutsi uphume tsine, uyekele lokusihleka sihluphekile. Ngimihlolo!" Lawo kwakungemavi enina waSiphilile. "Ngiyacela tsine, make wami, sewuke ungichazele ngalokugula kwaSiphilile, ngisuke ngiyalahleka", asho ngaleliphasi.

"Ufuna kuchazelwa, kuchazelwa kwani loku uyati! Angitsi lomntfwanami unjenje nguwe," kuvuleke sivalo kungene lijaha lihamba nalomunye babe baphetse tinwadzi taSiphilile tasesibhedlela. Wakhala kakhulu unina waSiphilile. Bangena bamtsatsa phasi bambeka etulu Zibonele. Thulasizwe waye wamsola kutsi nguye loZibonele, naye Zibonele walibukisisa lelijaha lelihamba naMbatha kutsi kwakungaba ngulesi lesinye singani saSiphilile. Wababukisisa. "Nguye lona, sibili," lelijaha likhomba Zibonele, asatfuke afile. "Nguye lomtsakatsi lodlala ngemntfwanami! Pho ufunani lapha? Nx! Ye mfana ase uphume lapha ngingaze ngikwente kabi mine! Thulasizwe ase simsebente!" Kusho uyise waSiphilile agane lunwabu.

"Hawu! Senifuna kungibulala ngingakeva kutsi ningibulalelani. Lucolo boMbatha! Angisiva lesizatfu senu. Ngicela litfuba ngichaze."

"Mkhipheni! Mkhipheni lomtsakatsi bo! Nisamyekela?"

"Hhayi, ake ume, LaMatsebula, sike simuve kutsi uta natiphi. Asesiphume-ke mfana, nawe mlamu wami siyoyikhulumela ngaphandle."

Nabefika ngaphandle evakale Mbatha atsi, "Chubeka mfana wakaMabuza." "Ngiyacolisa Shandu! Kusuke kuyala kutsi ngikhulume," akhiphe incwadzi ayinike uyise waSiphilile, naye ayendlulisele kuThulasizwe kutsi amfundzele. "Uyitfole nini wena mfana lencwadzi?" "NgaLesine Shandu, emva kwekuyifundza ngativa ngingasaphili kahle". Banikine tihloko boThulasizwe naMbatha.

Phendvula yonkhe imibuto ngekubhekisa tonkhe timphendvulo takho kuletheksthi lengenhla.

- | | | |
|-------|--|-----|
| 1.1.1 | Ucabanga kutsi yini lebangela kutsi emabhasi abe yindlala ngeLisontfo? | (1) |
| 1.1.2 | Bhala bubi balendlela lahambe ngayo kuyofika eNhlangano Zibonele uma ubuka tehlakalo talomuhla. | (1) |
| 1.1.3 | Kusho kutsini kutsi uyise waSiphilile 'wagana lunwabu?' | (1) |
| 1.1.4 | Yini lebeyibangela Zibonele angatsandzi kuhlala eNhlangano? | (1) |
| 1.1.5 | Kuya kwaZibonele kuyewuvusela Siphilile kukhombisani kubatali baSiphilile? | (1) |
| 1.1.6 | Kutsiwa yini ingati levame kuphuma etimphumulweni njengoba beyiphuma kuSiphilile? | (1) |
| 1.1.7 | Thulasizwe uhlobene njani nenina waSiphilile? Usho ngani? | (2) |
| 1.1.8 | Ngabe Zibonele abemati yini kutsi Thulasizwe ungubani? Sekela imphendvulo yakho. | (2) |
| 1.1.9 | Yini leyabangela unina waSiphilile abe nesiciniseko sekutsi Siphilile usesibhedlela nje ngenca yaZibonele? | (2) |

- 1.1.10 Lesaga lesitsi, 'Intsandzane lenhle ngumakhotfwa ngunina' sihambelana kanjani naletheksthi? Chaza. (2)
- 1.1.11 Zibonele abekwati kufundza. Sekela nobe uphikise lombono ngemaphuzu LAMABILI. (2)
- 1.1.12 Sakabani sinanatelo senina waSiphilile? (1)
- 1.1.13 Letincwadzi letingena neyise waSiphilile ngabe tani ngekwakho kubona? (2)
- 1.1.14 Wena ucabanga kutsi beyinamlayeto muni lencwadzi lebeyiphetfwe nguZibonele? Chaza. (2)

1.2 Bukisisa lesibonwa lesingentasi bese uphendvula imibuto letawulandzela.

Danisile wasindza engotini yemoti aya esikolweni lesingemakhilomitha langemashumi lamabili kusuka kubo ahamba ngetinyawo.



- 1.2.1 Uma ufundzisisa lesibonwa lesingenhla, Danisile walimala tiphi titfo temtimba? (1)
- 1.2.2 Bhala tihlobo LETIMBILI tetinsita letisetjentiswa nguDanisile kutsi akhone kuyofika esikolweni. (2)

- 1.2.3 Nakungatsiwa Danisile asitwe ngetindlela letincono kunaleti latisebentisako, wena ungamsita ngatiphi tindlela? Bhala TIMBILI. (2)
- 1.2.4 Tingoti temigwaco tiwukhinyabeta njani umnotfo walelive? Bhala KUNYE. (1)
- 1.2.5 Hulumende ubasita ngayiphi indlela bantfu labanetidzingo letifana netaDanisile? Bhala KUNYE. (1)
- 1.2.6 Ngabe kuhle yini kutsi bantfwana labanetidzingo letifana netaDanisile bakhelwe tikolo tabo bodvwa? Sekela umbono wakho. (2)

SAMBA SIGABA A: 30

SIGABA B: SIFINYETO

Fundza lethekesthi lelandzelako bese uyayifinyeta ngewakho emagama ngendlela yetindzima ubhekise kuloko lokumele kucashelwe kute kugwenywe tingoti temigwaco eNingizimu Afrika. Sifinyeto sakho asibe ngemagama langabi ngaphasi kwalange-60 aphindze angabi ngetulu kwalange-70.

- Cala ngekwenta luhlaka ngembikwekufinyeta lethekesthi.
- Luhlaka aluветwe ngalokucacile. Dweba umugca lovundlile etukweluhlaka nawucedza kufinyeta. Uma ungakakwenti loku kutawumakwa luhlaka locale ngalo njengesifinyeto.
- Sifinyeto sakho asibe ngendlela yetindzima (emapharagrafu) **letimumetse emaphuzu lasikhombisa.**
- Utawulahlekelwa ngemamaki nangabe sifinyeto sakho sibhalwe sangalandzeli indlela yetindzima.
- Khombisa linani lemagama lowasebentisile ekugcineni kwemphendvulo yakho.

Siswati sitsi lithuna lemuntfu liseceleni kwendlela. Kubalulekile kutsi njalo umuntfu nakaphuma ekhaya avalelise ngobe kunyenti langahle ahlangane nako endleleni lokungamenta angabuyi. Tingoti tendlela nguletinye tetintfo letiyimbangela yekucedza imphilo yemuntfu kungakalindzelwa. Esikhatsini lesinyenti loko kubangelwa budlabha lobentiwa bashayeli nalabo labahamba ngetinyawo kanye nesimo setigitjelwa letisetjentiswako.

Kuvamile kutsi kuvakale kutsi bakhona bashayeli labangaceceshwa, kodvwa bavele babe netindlela letinsombo tekutfolela tincwadzi tekushayela. Kuhle kutsi bashayeli bafundzele kushayela kute bashayele ngekuphepha kunekutsi babe imihlatjelo yemigwaco. Kunetimpawu letecwayisa bashayeli ngetimo temigwaco njengelinani lelitubane lekumele ligcinwe ngenca yebungoti tsite bemgwaco. Umshayeli longakaceceshwa ngeke akwati loko. Umgwaco ngekwawo uyakhuluma. Lemigca ledvvetjiwe inenshokutsi letsite, lesho kutsi bangendlulana nobe balandzelane.

Kodvwa-ke ayikho imphunga yelihlati, loluhlobo lwebashayeli lugcina lubanjiwe lubukene nesandla semtsetfo, lesicondzisa tigwegwe.

Bashayeli bayecwayiswa kutsi nabahamba libanga lelidze kumele baphumule nabativa sebadziniwe.

Similo sebashayeli sibaluleke kakhulu emmangweni. Umshayeli kumele ati kutsi akukavunyelwa kutsi ashayele anatsile ngobe loko kubanga tingoti. Kumele atidzele ematsambo ayilandzele. Labanye bachudzelana ngelitubane emigwacweni bese babanga tingoti letitsatsa imiphefumulo lengenacala. Kumele bati kutsi litubane liyabulala.

Tingoti temigwaco atibangwa ngulabo labahamba ngetigitjelwa kuphela. Nalabo labahamba ngetinyawo banalo ligalelo ekwandziseni linani letingoti temigwaco. Loku kwenteka kakhulu lapho kuncanyulwa khona imigwaco. Kumele bakhumbule kutsi sivinini semoti asilingani nesemuntfu lohamba ngetinyawo. Timoti tichamuka macala omabili, ngasebuncele nangasekudla lapho kumele babuke khona ngekucopehelela lokukhulu ngembikwekutsi bancamule umgwaco. Bantfu labahamba ngetinyawo kumele bati inhlobo yetembatfo lekumele batigcike kute babonakale kalula kubashayeli, ikakhulukati ebusuku lapho kumele bagcike timphahla letikhanyako kute babonakale kalula kubashayeli. Ngemuntfu munye nje lowehluleke kulandzela timphawu temgwaco kungalahleka imiphefumulo leminyenti, kusale tintsandzane, bafelokati nebafelwa.

Kubalulekile kutsi kubukisiswe tigitjelwa kutsi tisesimeni lesifanele yini. Kukanyenti kuvakala tingoti temabhasi, tematekisi netetimoti ngenca yekungabikho esimeni lesifanele. Umshayeli kumele ayicwaningisise imoti ngembikwekuyishayela.

SAMBA SIGABA B: 10

SIGABA C: LUHLELO NELULWIMI**UMBUTO 3**

Fundza lethekesthi lelandzelako bese uphendvula imibuto letawulandzela.

Tibhelu besetilicedzile leli leNingizimu Afrika. Ngiko lokwente kutsi sitfunyelwe njengelicembu lelibuya ephalamende etindzaweni letikhungetfwe ludlame lwekufunwa kwetinsita kutsi siyewuphenya ngaletinkinga. Ihelikhoptha lebesihamba ngayo sayishiya khashane nalelilokishi lebesiya kulo. Sanyonyoba sehla nentsaba sate satsi cababa etinyaweni tayo. Kwenteka konkhe loku kusemini lilanga lishisa litsi bhe. Njengobe belishisa nje, labanye betfu bebagcoke tigcoko telilanga. Intsaba yasibuka nje yabindza yatsi du. Sabona natsi kutsi sititselile.

Satsi nasitsi siyajika nje nentsaba, satfola bantfu babutsekile bahleli, ubona nje kutsi lukhulu labaludzingidzako. Lokwenta kutsi babe banyenti kangaka kutsi linyenti labo alisebenti ngobe kute lapho bangasebenta khona kulenzawo, likati lilala etiko.

Likhansela lesigodzi lavele lasukuma lacondza kitsi, lasibingelela. Litsite lisuka lasibuta kutsi ngubani sosiswebhu wetfu, labuye lasibuta nemvelaphi yetfu. Labasikati lebesihamba nabo besebambhoshana baphaphatsekiswe kwetfuka, pho vele ngibo bafati labasibambisako ngekungabi nesifuba nemfihlo. Phela baba neluvalo entsanyeni njengesicoco. Wonkhe umuntfu watibonela kutsi kubi, besingashiswa nekushiswa.

"Hlala phasi, uvale umlonyana wakho wena!" Kusho lenye indvodza. Phela labantfu bebangaboshwa, licala lembula ingubo lingene mntfwanemuntfu.

- 3.1 Kunelovelomagama lolusetjentiswe kulethekesthi lengenhla, lusebentise emshweni lotakhele wona kuveta kutsi uyalwati kutsi lushoni. (1)
- 3.2 Nika inchazelo yaletaga letilandzelako letitsetfwe kulethekesthi lengenhla.
 - 3.2.1 Likati lilala etiko (1)
 - 3.2.2 Licala lembula ingubo lingene (1)
- 3.3 Phindza ubhale lomusho lolandzelako, esikhundleni seligama lelidvwetjwelwe ufake mcondvophika.

Ikhansela yacondza kitsi yasibingelela. (1)
- 3.4 Khokha imisho kulethekesthi lengenhla lenaletinongo letilandzelako:
 - 3.4.1 Kumuntfutisa (1)
 - 3.4.2 Sifaniso (1)
- 3.5 Phindza ubhale lomusho esikhundleni seligama lelidvwetjelwe ufake libintana lelingalimela.

Yasibuta kutsi ngubani sosiswebhu wetfu ... (1)

- 3.6 Phindza ubhale lomusho, esikhundleni seligama lelidvwetjelwe ufake lenhlonipho.

Kwenteka konkhe loku kusemini lilanga lishisa litsi bhe. (1)

- 3.7 Nika wakho umbono nganankha emavi lalandzelako latsetfwe kuletheksthi lengenhla:

"Pho vele ngibo bafati labasibambisako ngalokungabi nasifuba nemfihlo." (2)
[10]

UMBUTO 4

Fundza letheksthi lelandzelako lenemaphutsa elulwimi nesipelingi bese uphendvula imibuto letawulandzela.

Emave emhlaba bekahlangene lapha eNingizimu Afrika. Bonkhe bantfu bebatijabulisa ngekubukela indzebe yelibhola lendzebe yemhlaba jikelele, lebebasolo bayilindzele ngemehlo labovu. Nobe emalungiselelo alemidlalo aba nato tinkhinga letinyenti, kepha ngaMabasa nangaKholwane kwadaleka umlandvo eNingizimu Afrika. "Angati kutsi badlali bakitsi bafundzeni kulemidlalo lemikhulu nakangaka," kwaphawula Mengameli wakuleli. Bayati bona bantfu bakitsi kwekutsi imidlalo yemhlaba ifukula umnotfo, ihlanganise netive lebetingatani, tibe sive sinye. "Banesibindzi badlali bakitsi bo! Imisipha yabo icinile" Tiphatseni kahle bakitsi, iAfrika yenu. Ematfuba enu semayatiwa emhlabeni wonkhe. Umuntfu longatisukumeli atentele matfupha usalela emuva. Fundzani-ke kanjalo!

- 4.1 Kuletheksthi lengenhla kuneligama lelipelwe kabi. Bhala leligama ulipele kahle. (1)
- 4.2 Unesichazamagama seSiswati, ufuna inshokutsi yeligama lelitsi, 'sibindzi.' Nawubuka simongcondvo sekusetjentiswa kwaleligama kuletheksthi lengenhla, nguyiphi inshokutsi sichazamagama sakho lesitakunika yona? (2)
- 4.3 Shano umsebenti walesakhi lesidvwetjelwe kuletheksthi lengenhla. (1)
- 4.4 Sebentisa tabitonanibhanca letikuletheksthi lengenhla emishweni LEMIBILI lotakhele yona ibe setikhatsini letengca. Tidvwebele letabitonanibhanca. (2)
- 4.5 Bhala lomusho lolandzelako ube yinkhulumombiko:
"Angati kutsi badlali bakitsi bafundzeni kulemidlalo lemikhulu nakangaka," kwasho Mengameli wakuleli. (3)
- 4.6 Shano umsebenti wesabito selucobo kulomusho lolandzelako:
Bayati bona bantfu bakitsi kwekutsi imidlalo ifukula umnotfo welive. (1)

- 4.7 Phindza ubhale lomusho ugucule libito lelidvwetjelwe kuze liletse umcondvo wesinciphiso.
IMISIPHA yabo icinile bo! (1)
- 4.8 Shano umcondvo loletfwa ngunati takhi letidvwetjelwe kulemisho lelandzelako:
4.8.1 Bantfu batijabulisa ngekubukela libhola lendzebe yemhlaba. (1)
4.8.2 NgaMabasa naKholwane kwadaleka umlandvo eNingizimu Afrika. (1)
- 4.9 Phindza ubhale lomusho lolandzelako bese uwucedzela ngemshwana lokhontile lomele sizatfu kuze kwakheke umusho lomagalagala.
Bayati bona bantfu ... (1)
- 4.10 Sebentisa sento, 'fundza,' lesikuletheksthi lengenhla, wakhe ngaso letindlela tesento letilandzelako:
4.10.1 Indlela leyamile (2)
4.10.2 Indlela yesimo (2)
- 4.11 Phindza ubhale lomusho lolandzelako ulungise emaphutsa elulwimi nemtsetfo wesipelingi seSiswati:
Tiphatseni kahle bakitsi, iAfrika yenu. Ematfuba enu sematiwa emhlabeni wonkhe. (2)
[20]

SAMBA SIGABA C: 30
SAMBA: 70